

## **Uunga siunnersuut:**

### **Kalaallit Nunaanni pasinapiluttumik kalerriisunik illersuineq pillugu Inatsisartut inatsisaat**

#### **Kapitali 1**

##### *Inatsisip atuuffia nassuiaatillu*

§ 1. Inatsisartut inatsisaat inatsisinik mianernartunillu allanik unioqqutitsinerit pillugit nalunaaruteqarnernut atuuppoq, takukkilli imm. 2 aamma 3.

*Imm. 2.* Inatsisartut inatsisaat illersornermi sillimaniarnermilu pissutsit pillugit neqeroortitsinerit malittarisassanik unioqqutitsinerit nalunaaruteqarnernut atuutinngilaq.

*Imm. 3.* Inatsisartut inatsisaat ukunani aamma atuutinngilaq:

- 1) Paasissutissanut eqqartuussisoqarneq pillugu Kalaallit Nunaanni eqqartuussisarnermik inatsimmi § 81 naapertorlugu eqqartuussissuserisut nipangiusimasussaatitaanerannut.
- 2) Paasissutissanut napparsimasut inatsisitigut inissisimanerat pillugu Inatsisartut peqqussutaanni § 23 naapertorlugu peqqinnissaqarfimmi sulisut nipangiusimasussaatitaanerannut.
- 3) Eqqartuussivimi isumasioqatigiinnermi taasinermilu paasissutissanut nipangiusimasussaatitaanermut ilaasunut.
- 4) Pinerluttulerineq pillugu inatsimmi sulianut.

§ 2. Unioqqutitsinerit immikkoortuni aalajangersimasuni malittarisassat naapertorlugit nalunaarutit pillugit immikkut malittarisassat suli atuupput.

*Imm. 2.* Inatsimmi matumani malittarisassat pissuseq unioqqunneqarsinnaanngitsumik killilersorneqanngippat, malittarisassani taaneqartuni oqaaseqatigiinnut siullernut tapertaapput.

§ 3. Inatsisartut inatsisaanni matumani uku imatut paasineqassapput:

- 1) Unioqqutitsinerit: Iliuutsit iliuseqannginnerilluunniit:
  - a) annertuumik unioqqutitsinerullutik pissutsilluunniit mianernartuullutik, tak. § 1, imm. 1, imaluunniit
  - b) Inatsisartut inatsisaata attuuffiani malittarisassani siunertanik unioqqutsinnaanngortitsisut, tak. 1, imm. 1.
- 2) Unioqqutitsinerit pillugit paasissutissat: Paasissutissat suulluunniit, tassunga ilanngullugit unioqqutitsisoqavinneranik unioqqutitsinerusinnaasunilluunniit pissutissaqartumik pasitsaassinerit, suliffimmi pasinapiluttumik kalerriisartup suliffigisaani suliffigisimasaanilluunniit, suliffimmiluunniit allami sulinini aqutigalugu pasinapiluttumik kalerriisartup attavigisaani pisut, unioqqutitsinerinilu taamaattunik isertuussiniarnerit.

- 3) Nalunaaruteqarneq: Unioqqutitsinerit pillugit paasissutissanik oqaasiinnartigut allaganngorluguluunniit nalunaarutiginnineq.
- 4) Suliffigisami nalunaaruteqarneq: Suliffimmi namminersortumi pasinapiluttoqarneranik kalerriisoqarsinnaatitsinermit unioqqutitsinerit pillugit paasissutissanik oqaasiinnartigut allaganngorluguluunniit nalunaarutiginnineq.
- 5) Suliffigisap avataanut nalunaaruteqarneq: Unioqqutitsinerit pasinapiluttoqarneranik suliffigisap avataani kalerriisoqarsinnaatitsinermit Inatsisartut inatsisaannut matumunnga ilaasumut paasissutissanik oqaasiinnartigut allaganngorluguluunniit nalunaaruteqarneq.
- 6) Tamanut saqqummiussineq: Unioqqutitsinerit pillugit paasissutissanik tamanut saqqummiussineq.
- 7) Pasinapiluttumik kalerriisoq: Inuk unioqqutitsinerit, pissutsilluunniit ilungersunartut allat pillugit paasissutissanik suliamik ingerlatsinerminut atatillugu pissarsiarisimasaminik nalunaarutiginnittoq.
- 8) Akunermiliuttoq: Inuk pasinapiluttumik kalerriisup sulinermit atatillugu nalunaaruteqarnerani ikiuisoq ikiuineralu isertuunneqartariaqartoq.
- 9) Sulinermit atatillugu: Pisortani namminersorlutillu inuussutissarsiorturni maannakkut siusinnerusukkullu suliaqarneq, suliap suunera apeqquataatinnagu, inuit tassani unioqqutitsineq pillugu paasissutissanik pissarsillutik, inuillu taakku paasissutissat taamaattut nalunaarutigigunikkut pillaatitut akiniarneqariaannaallutik.
- 10) Inuk attuumassuteqartoq: Inuk imaluunniit inatsisit tunngavigalugit inuttut isigineqartoq nalunaaruteqarnermi avammulluunniit saqqummiussinermit inuttut unioqqutitsisutut oqaatigineqartoq, inuulluunniit taaneqartup attaveqarfigisaa.
- 11) Pillaatitut akiniutit: Sulinermit atatillugu toqqaannartumik toqqaanngitsumilluunniit iliuuseqarneq iliuuseqannginnerluunniit, suliffimmi namminermi avammulluunniit nalunaaruteqarnerup avammulluunniit saqqummiussinerup kingunerisaa pasinapiluttumik kalerriisumulluunniit pissutissaqanngitsumik ajoqutaalerneranik kinguneqarsinnaasoq.
- 12) Ingerlatitseqqinneq: Nalunaarummik tigusaqartup oqartussalluunniit oqaatigineqartup eqqortuuneranik nalilersuisussaataasup iliuusissaq aalajangigaa, unioqqutitsinerullu iliuuseqarfiginissaata pinngitsoortinnissaa naleqqulluni, tassunga ilanngullugu iliuuseqarnikkut, soorlu suliffimmi namminermi misissuineq, pinerluttoqarsimanersoq paasiniaaneq, eqqartuussisutigoortumik sulissutigititsineq, aningaasat utertinneqarnissaannik eqqartuussivinnut suliassanngortitsineq sulialluunniit naammassineqarnera.
- 13) Akissuteqarneq: Ingerlatitseqqinneq pillugu taamatullu ingerlatitseqqinnermut tunngavilersuut pillugu pasinapiluttumik kalerriisumut nalunaaruteqarneq.
- 14) Pisortat ingerlatsinerat: Inatsisilerinermit immikkoortut pisortat ingerlatsineranni suliassat sularineqartarnerat pillugu inatsimmi § 1, imm. 1-imi ilaasut tamarmik. Pisortat ingerlatsineranni suliassat sularineqartarnerat pillugu Inatsisartut inatsisaanni § 1, imm. 1-imi allaqqavoq, inatsit pisortat ingerlatsineranni immikkoortunut tamanut atuuttoq. Inatsisilerinermit immikkoortut tamarmik taamaalillutik pisortat ingerlatsinermit § 1, imm. 1-

imut ilaasut, pisortat ingerlatsinerini aamma inatsit manna naapertorlugu ilaapput. Pisortat ingerlatsineranni Inatsisartut sulisoqarfiillu tassunga atasut aamma ilaapput. Naalagaaffiup Kalaallit Nunaanni oqartussaasui, eqqartuussiviit ilanngullugit, inatsimmi matumani ilaanngillat.

15) Namminersortut ingerlatsinerat: Inatsisilerinermi immikkoortut pisortat ingerlatsineranni suliassat suliarineqartarnerat pillugu inatsimmi § 1, imm. 1-imi ilaanngitsut aamma Inatsisartut ataanni sulisoqarfiinilu tassunga atasuni imaluunniit Danmarkip naalagaaffiata sulisoqarfiini, tassunga ilanngullugit eqqartuussivinnut, ilaanngitsut tamarmik.

### *Isumaqatigiissummut tunngasut*

§ 4. Inatsisartut inatsisaat pasinapiluttumik kalerriisumut inunnulluunniit attuumassuteqartunut ajoqutaasumik isumaqatigiissuteqarnikkut unioqqunneqarsinnaanngilaq.

## **Kapitali 2**

### *Pasinapiluttumik kalerriisunik illersuinerumut illersuinerullu imarisaanut piunasaqaatit*

§ 5. Inatsisartut inatsisaat pasinapiluttumik kalerriisumut imatut iliuuseqartumut atuuppoq:

- 1) Kapitali 3 naapertorlugu suliffimmi pasinapiluttoqarneranik kalerriisoqarsinnaatitsinerumut nalunaaruteqarneq.
- 2) Kapitali 4 naapertorlugu avataani pasinapiluttoqarneranik kalerriisoqarsinnaatitsinerumut nalunaaruteqarneq.

*Imm. 2.* Inatsisartut inatsisaat pasinapiluttumik kalerriisup tamanut saqqummiussinera imatut pisoqarnerani atuuppoq:

- 1) Pasinapiluttumik kalerriisup tamanut saqqummiussisoq pasinapiluttumik kalerriisarnerumut immikkoortortaqaarfik piffissarititap § 12, imm. 2, nr. 3, aamma § 18, imm. 2, nr. 3-mi aalajangerneqartup iluani naleqquttumik nalunaaruteqarneq pillugu iliuuseqarsimatinnagu kapitalit 3 aamma 4 naapertorlugit siullermik suliffimmi tamanut saqqummiussisimappat toqqaannartumilluunniit tamanut saqqummiussisimappat.
- 2) Pasinapiluttumik kalerriisup tamanut saqqummiussisoq unioqqutitsineq pisortat soqutigisaannik ajoqusiinissaa aarlerinaateqartoq ajoqutaavissasorluunniit tunngavissaqartumik isumaqarpat.
- 3) Pasinapiluttumik kalerriisup tamanut saqqummiussisoq avataani pasinapiluttoqarneranik kalerriisoqarsinnaatitsinerumut nalunaaruteqarnermi pillaammik akiniaasoaqariaannaasooq imaluunniit suliami unioqqutitsinerup sunniuteqartumik iliuuseqarfiginissaa ilimanarpiannngitsooq tunngavissaqartumik isumaqarpat.

§ 6. Inatsisartut inatsisaatigut illersuineq taamaallaat paasissutissat nalunaarutigineqartut tamanulluunniit saqqummiunneqartut piffissami nalunaaruteqarfiusumi eqqortuunerannik pasinapiluttumik kalerriisoq tunngavissaqartumik ilimasussimappat paasissutissallu § 1, imm. 1 naapertorlugu Inatsisartut inatsisaata atuuffiata ataaniippata atuuppoq.

§ 7. Pasinapiluttumik kalerriisoq §§ 5 aamma 6-imi illersuineramik piumasqaatinik eqqortitsippat, paasissutissanik pineqartunik nalunaaruteqarnermi tamanulluunniit saqqummiussinermi pissutsinik Inatsisartut inatsisaanni § 1, imm. 1-imi ilaasunik ersersitsinissap pisariaqarneranik pasinapiluttumik kalerriisoq tunngavissaqartumik ilimagisaqarsimanera piumasaralugu nipangiussimasussaataaeramik inatsisikkut aalajangerneqartumik sumiginnaasimasutut isigineqassanngilaq tamatumunngalu akisussaatinneqassanani.

*Imm. 2.* Pasinapiluttumik kalerriisoq §§ 5 aamma 6-imi illersuinissamik piumasqaatinik eqqortitsisoq taamatut iliorneq immikkut pineqaatissiissutaasinnaasumik iliornerunngitsoq piumasaralugu paasissutissanik nalunaarutigineqartunik tamanulluunniit saqqummiunneqartunik pissarsisimaneranik akisussaatinneqanngilaq.

§ 8. Pasinapiluttumik kalerriisoq Inatsisartut inatsisaanni tamanna pillugu malittarisassat suliffimmi avataanullu nalunaaruteqarnerata avammulluunniit saqqummiinerata kinguneranik pillaaammik akiniarneqassanngilaq, tassunga ilanngullugit siorasaarneqassanngilaq pillaaammilluunniit akiniarneqassanani. Pasinapiluttumik kalerriisoq aamma nalunaaruteqarnissamut akornuserneqassanngilaq akornuserniarneqassananilu.

*Imm. 2.* Imm. 1 naapertorlugu pillaaammik akiniarneqarnissamut illersuinermi matumani inuit aamma ilaapput:

- 1) Akunnermiliuttut.
- 2) Inuit pingajui pasinapiluttumik kalerriisumut attuumassuteqartut sulinernullu atatillugu pillaaammik akiniarneqarsinnaasut.
- 3) Suliffeqarfiit oqartussalluunniit pasinapiluttumik kalerriisup pigisai imaluunniit sulinermut atatillugu allatut sullitarisai.

*Imm. 3.* Pasinapiluttumik kalerriisoq, pasinapiluttumik kalerriisup unioqqutitsinerup § 1, imm. 1-imi ilaasup ersersinnissaa pisariaqartutut pissutissaqartuuneranik ilimagisaqarnera piumasaralugu eqqartuussivinnut suliassanngortinneqarnissamut akerliliiniarluni nalunaaruteqarnerup avammulluunniit saqqummiinerup patsisissaqartuuneranik nalunaaruteqarsinnaatitaavoq.

### **Kapitali 3**

*Suliffimmi pasinapiluttoqarneranik kalerriisoqarsinnaatitsinerit*

*Pasinapiluttoqarneranik kalerriisoqarsinnaatitsinermik pilersitsinissamik periarfissaq*

**§ 9.** Sulisitsisut namminersortut sulisut paasisutissanik § 1, imm. 1-imut ilaasunik nalunaaruteqarfigisinnaasaannik pasinapiluttoqarneranik kalerriisoqarsinnaatitsinermik pilersitsisinnaapput.

*Imm. 2.* Sulisitsisut imm. 1-imi ilaasut suliffeqarfissuarmi namminermi pasinapiluttoqarneranik kalerriisoqarsinnaatitsinermik pilersitsisinnaapput.

*Imm. 3.* Namminersorlutik inuussutissarsiuteqartuni sulisitsisut suliffigisami pasinapiluttoqarneranik kalerriisoqarsinnaatitsinermik pilersitsineq ingerlatsinerlu eqqarsaatigalugit isumalluutit avitseqatigiissutigisinnaavaat.

*Suliffimmi nalunaarutininik ingerlatitseqqinnernilu suleriaatsit*

**§ 10.** Suliffimmi pasinapiluttoqarneranik kalerriisoqarsinnaatitsineq allaganngorlugu oqaasiinnartigulluunniit taakkuluunniit marluk atorlugit nalunaaruteqarsinnaatitsisoqassaaq.

*Imm. 2.* Imm. 1 naapertorlugu oqaasiinnartigut nalunaaruteqarnissamut periarfissaqarpat, nalunaaruteqarneq pasinapiluttumik kalerriisup qinnuiviginninneratigut naleqquttumik piffissaliussaqarluni naapilluni ataatsimiinnermi pisinnaassaaq.

*Pasinapiluttumik kalerriisoqarnermut immikkoortortaqarfimmik toqqaaneq*

**§ 11.** Sulisitsisoq § 9 naapertorlugu suliffigisami pasinapiluttoqarneranik kalerriisoqarsinnaatitsinermik pilersitsinissamik toqqaasoq inummik immikkoortortaqarfimmilluunniit kinaassusersiunngitsumik ukuningga suliassaqartussamik toqqaassaaq:

- 1) Nalunaarutininik tigusisartoq pasinapiluttumik kalerriisumullu attaveqartoq
- 2) Nalunaarutininik malittarinninneq, tak. § 12, imm. 2, nr. 2.
- 3) Pasinapiluttumik kalerriisumut akissuteqartartoq, tak. § 12, imm. 2, nr. 3.

*Imm. 2.* Suliassat imm. 1-imi taaneqartut suliffeqarfissuarmi Inatsisartut inatsisaat manna malillugu suliarinninnissamik piumasqaammik eqqortitsisussamit suliarineqarsinnaapput.

**§ 12.** Suliffimmi pasinapiluttoqarneranik kalerriisoqarsinnaatitsineq imatut ilusilersorneqassaaq pasinapiluttumik kalerriisup, inuup attuumassuteqartup inuillu pingajuata nalunaaruteqarnermi taaneqartup kinaanerata isertuunneqarnissaa akuerineqanngitsumillu tamassuminnga pissarsisoqannginnissaa qulakkeerneqarlutik.

*Imm. 2.* Sulisitsisoq § 9-mut ilaatinneqartoq pasinapiluttoqarneranik kalerriisoqarsinnaatitsinermi suleriaatsinik naleqquttunik ukuningga qulakkeerinniffiusunik atuutilersitsissaaq:

- 1) Pasinapiluttumik kalerriisoq nalunaarutip tiguneqarneranik taassuma tiguneqarnerata kingorna ullut arfineq marluk qaangiutsinnagit uppernarsaammik tigusaqassaaq.
- 2) Nalunaarut peqqissaartumik ingerlateqqinneqassaaq.
- 3) Pasinapiluttumik kalerriisoq piaarnerpaamik nalunaarutillu tiguneqarneranit qaammatinik pingasunik kingusinnerunngitsumik akissummik tigusaqassaaq, tak. nr. 1.

*Imm. 3.* Kinaaneq isertuullugu nalunaarutit suliffigisami pasinapiluttunik nalunaaruteqartarnermut immikkoortortaqaarfimmi suliarinissaannik pisussaataasoaqanngilaq.

#### *Paasissutissiisussaataitaneq*

**§ 13.** Sulisitsisup § 9 napertorlugu suliffigisami pasinapiluttoqarneranik kalerriisoqarsinnaatitsineq pilersitsinissamik toqqaasup paasissutissat uku ersarissumik paasiuminartumillu sulisuminit pissarsiarineqarsinnaatissavai:

- 1) Suliffimmi pasinapiluttoqarneranik kalerriisoqarsinnaatitsinermut nalunaaruteqarnermi suleriaaseq, tassunga ilanngullugu unioqqutitsineq suliffimmi namminermi sunniuteqartumik nalunaaruteqarnissamik kaammattuinnermi, pasinapiluttumillu kalerriisoq pillammik akiniuteqartoqariaannaasoaqannginneranik naliliippat.

#### *Uppernarsaasiortussaataitaneq*

**§ 14.** Sulisitsisup § 9 naapertorlugu pasinapiluttoqarneranik kalerriisoqarsinnaatitsinermik pilersitsinissamik toqqaasup imaluunniit § 15 naapertorlugu avataani pasinapiluttoqarneranik kalerriisoqarsinnaatitsinermik pilersitsisussaataitasup pasinapiluttoqarneranik kalerriisoqarsinnaatitsinermik pilersitsineq suleriaatsillu pillugit allaganngorlugu uppernarsaatit toqqortarissavai, tak. §§ 10-mit 20-mut.

### **Kapitali 4**

#### *Avataani pasinapiluttoqarneranik kalerriisoqarsinnaatitsineq*

#### *Avataani pasinapiluttoqarneranik kalerriisoqarsinnaatitsinermut pilersitsisussaataitaneq*

**§ 15.** Sulisitsisut uku sulisut paasissutissanik § 1, imm. 1-imi ilaatinneqartunik nalunaaruteqarfigisinnaasaannik avataani pasinapiluttoqarneranik kalerriisoqarsinnaatitsinermik pilersitsissapput:

- 1) Pisortani sulisitsisut.
- 2) Sulisitsisut namminersortut 30-nik amerlanerusunilluunniit sulisoqartut.

*Imm. 2.* Pasinapiluttoqarneranik kalerriisoqarsinnaatitsinerit immikkoortunut aalajangersimasunut inatsisit naapertorlugit pilersinneqartut, tak. § 2.

*Imm. 3.* Naalakkersuisut sulisitsisut namminersortut 30-nit ikinnerusunik sulisoqartut imm. 1-imi taaneqartumik pasinapiluttoqarneranik kalerriisoqarsinnaatitsinerit pilersitsinissaanut malittarisassiorsinnaapput.

*Imm. 4.* Sulisitsisut namminersortut avataani pasinapiluttoqarneranik kalerriisoqarsinnaatitsinermik pilersitsineq ingerlatsinerlu eqqarsaatigalugit isumalluutininik avitseqatigiissinnaapput.

*Avataani pasinapiluttoqarneranik kalerriisoqarsinnaatitsinermut piumasaqaatit*

**§ 16.** Avataani pasinapiluttoqarneranik kalerriisoqarsinnaatitsinermut allaganngorlugu oqaasiinnartigullu nalunaaruteqartoqarsinnaassaaq pasinapiluttumik kalerriisullu qinnuivigineratigut naleqquttumik piffissaliussaqaarluni naapilluni ataatsimiinnermi nalunaaruteqartoqarsinnaassalluni.

*Imm. 2.* Naalakkersuisut avataani pasinapiluttoqarneranik kalerriisoqarsinnaatitsinermut § 15-imi taaneqartumut piumasaqaatit pillugit sukumiinerusunik malittarisassiorsinnaapput.

**§ 17.** Sulisitsisut § 15-imi taaneqartut suleqatigisat pingajuannik ukuninnga akisussaasussamik toqqaassapput:

- 1) Nalunaarutininik tigusineq pasinapiluttumillu kalerriisumut attaveqarnej.
- 2) Nalunaarutininik tiguineqartunik ingerlatitseqqinneq, tak. § 18, imm. 2, nr. 2.
- 3) Pasinapiluttumik kalerriisumut akissuteqarnej, tak. § 18, imm. 2, nr. 3.

*Imm. 2.* Suliffeqarfiiit ingerlatseqatigiiffissuarnut ilaasut imm. 1-imi suliassat taaneqartunut, avataani suliamut peqataasunik toqqaasinnaapput.

*Imm. 3.* Naalakkersuisut imm. 2-mi atuutinnginnissaanut malittarisassiorsinnaapput.

*Avataanut nalunaaruteqarnermi ingerlatitseqqinnermilu suleriaatsit*

**§ 18.** Avataani pasinapiluttoqarneranik kalerriisoqarsinnaatitsineq imatut ilusilersorneqassaaq paasissutissat tamakkiisuunissaat, innarligassaanninneq isertuussinerlu inuillu akuerisaanngitsut taakkuninnga pissarsisinnaannginnissaat qulakkeerneqarlutik.

*Imm. 2.* Avataani pasinapiluttoqarneranik kalerriisoqarsinnaatitsinermi ukuninnga qulakkeerinnittussanik suleriaatsinik naleqquttunik atuutilersitsisoqassaaq:

- 1) Pasinapiluttumik kalerriisoq, taanna allatut ersarissumik qinnuiviginnissimangippat imaluunniit nalunaarummik uppenarsaanermi pasinapiluttumik kalerriisup kinaanerata illersugaanera navianartorsiortinneqassappat nalunaarummik tigusaqarnerup kingorna qaammatisiutit malillugit ullut arfineq marluk qaangiutsinnagit nalunaarut pillugu uppenarsaammik tigusaqassaaq.

- 2) Nalunaarummik peqqissaartumik ingerlatitseqqiisoqassaaq.
- 3) Pasinapiluttumik kalerriisoq tigusaqarnermik uppersaaneq qaammatit 3-t qaangiutsinnagit imaluunniit pisuni tunngavilersorluakkani qaammatit 6-ini, akissummik tigusaqassaaq.
- 4) Pasinapiluttumik kalerriisoq nr. 3 malillugu akissuteqarnermut atatillugu taamatut nalunaarfigineqarsimanngippat, nalunaaruteqarnerup kinguneranik misissuinerup inaarutaasumik inernera pillugu nalunaarummik tigusaqassaaq.
- 5) Pasinapiluttumik kalerriisoq paasissutissat ingerlateqqinneqarnissaat sioqqullugu nalunaarummik tunngavilersukkamik tigusaqassaaq, tak. § 25 imm. 4.

Imm. 3. Avataani pasinapiluttoqarneranik kalerriisoqarsinnaatitsineq nalunaarutininik Inatsisartut inatsisaata atuuffianut, tak. § 1, imm. 1, ilaanngitsunik itigartitsisoqarsinnaavoq, taakkulu oqartussanut allanut ingerlateqqinneqarnissaannik pisussaaffeqartoqanngilaq.

#### *Paasissutissiisussaataaneq*

**§ 19.** Sulisitsisoq § 15-imi ilaatinneqartoq avataani pasinapiluttoqarneranik kalerriisoqarsinnaatitsinermut nalunaaruteqarnermi suleriaaseq pillugu sulisuminut erseqqarissummik paasinartumillu paasissutissiisaaq.

#### *Suliap naammassineqarnera*

**§ 20.** Avataani pasinapiluttoqarneranik kalerriisoqarsinnaatitsinermi nalunaarutininik suliarineqarnermi imatut pisoqarnerani naammassineqarneranik aalajangiisoqarsinnaavoq:

- 1) unioqquutitsinerit pillugit paasissutissat ersarissummik mianernannginnerusunik imaqarpata ingerlatitseqqinnissarlu pisariaqanngippat, imaluunniit
- 2) inatsisit tunngavigalugit pissutsit pissusiviilluunniit allatut ingerlatitseqqinnissamik tunngavissaqartitsinngippata, siusinnerusukkut nalunaarutip suliarineqarnera naammassereerneqarsimasumut tunngatillugu unioqquutitsineq pillugu paasissutissanik pingaaruteqartunik nutaanik imaqanngippat.

*Imm. 2.* Imm. 1 malillugu aalajangiinerit allaffissornermi oqartussanut suliareqqitassanngortinneqarsinnaanngillat.

### **Kapitali 5**

#### *Suliffimmi avataanilu pasinapiluttoqarneranik kalerriisoqarsinnaatitsinermi sulianik suliarinninnermi malittarisassat*

**§ 21.** Nalunaarutit pasinapiluttoqarneranik kalerriisoqarsinnaatitsineq Inatsisartut inatsisaat manna naapertorlugu pilersinneqartumi, nalunaarutit suliarinissaannut pisariaqaraangat inuit pillugit paasissutissat suliarineqarsinnaapput.



*Suliffimmi avataanilu pasinapiluttoqarneranik kalerriisoqarsinnaatitsinermi  
nalunaarsuinnermut il.il. ataatsimut malittarisassat*

**§ 22.** Nalunaarutit tiguneqartut nalunaarsorneqassapput. Nalunaarsuineq nipangiussimasussaataitaaneq § 24-mi aalajangersarneqartoq naapertorlugu pissaaq.

*Imm. 2.* Inatsit manna naapertorlugu nalunaarutit taamaallaat pisariaqartillugu inatsillu malillugu piumasaaqatit eqqortinnissaannut pisariaqaraangat pissutsinullu naleqqiullugu sivilissusilimmik toqqortarineqarsinnaapput.

**§ 23.** Oqaasiinnartigut nalunaarutit pasinapiluttumik kalerriisup akuersinerata kingorna oqaloqatigiinnerit ataatsimiinneriluunniit immiunnerisigut imaluunniit ataatsimiinnermit oqaloqatigiinnermillu pasinapiluttumik kalerriisup misissussallugit, naqqissallugit periarfissaqarfisaanik eqqortumik takutitsisumik imaqarniliornikkut imaqarniliarlu atsiorlugu akuersineratigut, uppersarneqassapput.

*Imm. 2.* Digitalinngorlugu attaveqaatini oqaasiinnartigut nalunaarutit aamma oqaloqatigiinnermit eqqortumik takutitsisumik pasinapiluttumik kalerriisup misissussallugu, naqqissallugu periarfissaqarnissaanik allakkiornikkut allakkiarlu atsiorlugu akuersineratigut uppersarneqassapput.

*Nipangiussimasussaataitaaneq*

**§ 24.** Nalunaarutininik tiguisussatut nangitseqqiisussatullu toqqarneqartoq, tak. § 11 imaluunniit § 17, paasissutissat tassani allaqqasut eqqarsaatigalugit nipangiussimasussaataitaavoq.

*Imm. 2.* Imm. 1-imi nipangiussimasussaataitaaneq taamatuttaaq inunnt § 25 malillugu ingerlatitseqqiinnikkut imm. 1-imi paasissutissanik ilisimasaqalersunut atuuppoq.

*Imm. 3.* Imm. 1-imi nipangiussimasussaataitaaneq taamatuttaaq suliffeqarfinni pisortaniluunniit sulisunut akuerineqanngitsunut avataani pasinapiluttoqarneranik kalerriisoqarsinnaatitsinermik ingerlatsisunut, tak. § 15, paasissutissanik imm. 1-imi taaneqartunik siunertarineqanngitsumik ilisimasaqalersunut atuuppoq.

*Ingerlatitseqqiineq*

**§ 25.** Pasinapiluttumik kalerriisup kinaanera pillugu paasissutissat taakkunanani pasinapiluttumik kalerriisup kinaanera toqqaannartumik toqqaannanngitsumillu paasineqarsinnaalluni, sulisut nalunaarutininik tiguisinnaatitaasutut ingerlateqqiisinnaasutullu akuerineqartut, tak. § 11, imm. 1 aamma § 17, saniatigut pasinapiluttumik kalerriisoq ersarissumik akuersisimatinnagu allanut ingerlateqqinneqassanngillat.

*Imm. 2.* Paasissutissat imm. 1-imi ilaasut, tak. § 1, imm. 1, aatsaat unioqqutitsineq iliuseqarfiginialugu imaluunniit inuit akuusut imminnut illersorsinnaatitaanerisa qulakkeernissaa siunertaralugu pippat, pasinapiluttumik kalerriisoq akuersippat pisortani oqartussanut allanut ingerlateqqinneqassapput.

*Imm. 3.* Paasissutissat allat imm. 1-imi nalunaaruteqarnermi taaneqanngitsut allanut, § 11, imm. 1, aamma § 17 naapertorlugit, nalunaarutininik tigusinissamut aamma malitseqartitsinissamut toqqagaanngitsunut, § 1, imm. 1 naapertorlugu nalunaarummik malitseqartitsinertut imaluunniit unioqqutitsinermik pinaveersaartitsinertut, ingerlatseqqinneqarsinnaapput.

*Imm. 4.* Nalunaaruteqarnermi misissuinerit eqqartuussivimmiluunniit suliat suliamut attuumassuteqartut navianartorsiortinneqanngippata imm. 2 malillugu ingerlatitseqqiinnginnermi pasinapiluttumik kalerriisoq nalunaarfigineqassaaq.

*Imm. 5.* Pisortat ingerlatsineranni suliassat suliarineqartarnerat pillugu inatsimmi peqataasup suliassamut tunngasunik ilisimasaqarnera, peqataasup isumaanik tusarniaaneq tunngavilersuinerlu pillugit kapitalit 4-mit 6-imut paasissutissanut imm. 1-imi taaneqartunut atuutinngillat.

**§ 26.** Naalakkersuisut paasissutissat suliamut attuumassuteqartut tamaasa nalunaarutininik tiguisussatut ingerlatitseqqinnissamilu toqqarneqartunit, tak. § 11 aamma § 17, naatsorsueqqissaarnerit suliarinerannut atugassatut pissarsiarisinnaavai.

*Imm. 2.* Naalakkersuisut malitassamik nalunaarusiornermut atorneqarsinnaasumik aalajangersaassapput.

*Suliffimmi avataanilu pasinapiluttoqarneranik kalerriisoqarsinnaatitsinermi piffissaq suliarinniffik pillugu maalaarut*

**§ 27.** §§ 12 aamma 18-imi piffissaliussanik qaangiineq Naalakkersuisumut, Naalakkersuisut Siulittaasuata naammagittaalliornermik suliarinninnissamut akisussaaffiligaanut, maalaarutigineqarsinnaavoq.

*Imm. 2.* Naalakkersuisoq suliassaqarfimmut akisussaasoq isumaqarpat qaangiinnermut taamaallaat suliap suuneranik imarisaanillu pissuteqartoq, Naalakkersuisoq suliassaqarfimmut akisussaasoq allamik avataanilu pingajuusumik suliap suliarineqarneranut akisussaasussamik toqqaasinnaavoq. Suliap suliarineranut aningaasartuutit sulisitsisup akilissavai. Sulisitsisoq akiliisarnermik unitsitsinikuuppat allanilluunniit pissuteqarluni aningaasartuutit akilersinnaanngippagit, taakku Nunatta Karsianit akilerneqassapput.

## **Kapitali 6**

*Taartisiat, uppernarsaatiniq naliliineq pineqaatissiinerlu*

**§ 28.** Pasinapiluttumik kalerriisut imaluunniit inuk aamma inatsisitigut pisinnaatitaasoq § 8, imm. 2-mi ilaatinneqartoq, nalunaaruteqarnerup kinguneranik pillaatit akiniarneqartoq imaluunniit § 8, imm. 1 naapertorlugu nalunaaruteqarnissamut akornuserneqartoq, akornuserniarneqartorluunniit sulisitsisumit taarsiivigineqarnissamik piunasaqaateqarsinnaavoq. Taartisiassap annertussusia Kalaallit Nunaanni suliffeqarnermi atugassaritinneqartut isigalugit aalajangerneqassaaq.

*Imm. 2.* Sulisoq § 8, imm. 1-imut akerliusumik soraarsinneqarpat, soraarsitsineq, sulisullu atorfirmiiniiginnassanerluni sulileqqissalluniluunniit kissaatigippagu, atorunnaarsinneqassaaq. Tamannali immikkut pisuni aamma illuatungeriit soqutigisaannik naliliinerup kingorna atorfeqaannarnissap atorfineqqinnissalluunniit piunasarinnissaa naleqqutinngitsuusorinarpat atuutinngilaq.

*Imm. 3.* Pasinapiluttumik kalerriisoq unioqqutitsinerit, tak. § 7, imm. 2, pillugit uppersaatinik pissarsinerup imaluunniit paasissutissanut uppersaatisannik pissarsiniarnerup kinguneranik pillaatit akiniarneqartoq taartisiaqarnissamik piunasaqaateqarsinnaavoq. Taartisiap annertussusia Kalaallit Nunaanni suliffeqarnermi atugassaritinneqartut isigalugit aalajangerneqassaaq.

**§ 29.** Pasinapiluttumik kalerriisup Inatsisartut inatsisaat manna malillugu nalunaaruteqarnermi tamanulluunniit saqqummiussineri ajoqutissarsisimalluni uppersarsarpagu illuatungerisap ajoquteqalerneq nalunaaruteqarnerup kinguneranik pillaammik akiniutaanngitsoq uppersarsassavaa.

*Imm. 2.* Imm. 1 taamatuttaaq inunnut aamma inatsisitigut pisinnaatitaasunut § 8, imm. 2-mi ilaatinneqartunut suliamut attuumassuteqartillugu atuuppoq.

**§ 30.** Kalaallit Nunaannut pinerluttulerineq pillugu inatsit malillugu pillaammik akiliisitsinikkut pineqaatissinneqarsinnaavoq:

- 1) § 24-mik piaaraluni mianersuaalliorujussuarluniluunniit unioqqutitsisoq, imaluunniit,
- 2) piaaraluni paasissutissanik eqqunngitsunik nalunaarutiginnittoq tamanulluunniit saqqummiisoq.

*Imm. 2.* Sulisitsisoq, tak. §§ 9 imaluunniit 15, sulisitsisup kapitalit 3, 4 aamma 5 malillugit pisussaaffimminik eqqortitsinngitsoq Kalaallit Nunaannut pinerluttulerineq pillugu inatsit malillugu pillaammik akiliisitsinikkut pineqaatissinneqarsinnaavoq.

*Imm. 3.* Ingerlatseqatigiiffiit il.il. (inatsisitigut pisinnaatitaasut) pinerluttulerineq pillugu Kalaallit Nunaannut inatsimmi kapitali 5 malillugu pinerlussimasutut akisussaatinneqarsinnaapput.

*Imm. 4.* Pillaammik akiliitutit arsaarinnissutilluunniit, imm. 1, 2 imaluunniit 3 malillugit aalajangerneqartut, Nunap Karsianut akilerneqassapput.

## **Kapitali 7**

*Atuutilersitsinermut ikaarsaariarnermullu aalajangersakkat*

§ 31. Inatsisartut inatsisaat 1. juli 2024-mi atuutilissaaq.

*Imm.* 2. Inatsisartut inatsisaat inatsisip atuutilersinneqarnera sioqqullugu pisunut atuuppoq.

*Imm.* 3. Kapitali 4 sulisitsisunut namminersortunut 100-t tikillugit sulisulinnut 1. januar 2025-mit aatsaat atuutilissaaq.

*Namminersorlutik Oqartussat, ulloq xx. Xx 2023*

Naalakkersuisut siulittaasuat